

TBCC MUALPHO TUM KHATNA LEH HNIHNA HI SAWRKAR THIAM LOH VE VE A NI.

Ruatfela Nu

Thuhma: TBCC chungchangah content duh vanga youtuber chhuak thar (kan mamawh belh tawh loh the lul nen, thil thleng lian deuh a awmin kan neih belh zela a pawe!) kan neih belh teuh a, TBCC sawiseltute sawisel ve lehchhawngte nen lam inhmuhmawhna a tam tawh bawh a, chu lamhawi chu sawi lo ila: TBCC ami an thi thin leh, ‘hur سوالنا hmanga khaikhem tawk’ nia insawite an awm avangin, Ni, 06.05 2025 khan TBCC chhui chiangtu tur ‘Inquiry Committee’ din turin concern department, social welfare director, hnenah ziakin ka theh lut a, an chhui chian duh loh chuan an thu, he welfare state hi a welfare lo hle tihna a ni ang a, kan tualzal nunah social welfare ni loin, social injustice a tlangnel zawk tihna pawh a ni ang.

Keipawh TBCC an sawiselna a dik leh dik loh chhui chiang tura thuneitute hnea lehkha ka theh luh vang ngawta min hmuhmawh an awm a, a pawe lo e. Zu leh ruihlo ngawlvelna te, hur سوالنا te, hausak thut duh vanga dan phal loh thila sumdawnnate leh hlemhletnate hi ram inrelbawhna felhleh rah chhuak a ni a. Kohhran hoin social justice a ngaihthah vang a ni bawh tih hi Bible-ah a inziak chiang em a, ka hnual chuang lo.

Mipui / sawrkar hnathawkte hian eng nge an tih thin?: Social welfare department hnuaiah zu leh ruihlo ngawlveite enkawl lama mawhpurtu, mahni inrelbawh hrana office changtlung tak nei, thawktu pawh eng nge maw zat awm- Mizoram Social Defense & Rehabilitation Board (MSD&RB) hian, TBCC mualpho tumkhatna leh tumnihna inkarah eng nge an tih ang tih ka ngaihtuah fo thin a. Engati nge hma an lak sawk sawk loh? MSD&RB nen hian building khat kan luah ho tawh a, de-addiction centre dintute training an pe thin a, TBCC an tel ve ngai lo a ni mai thei e. Kum khata MSD&RB tana sum ruahman (budget) engzat nge ni ang, a beitham viau ang em? Phullem phah ai chuan mihring hi a pawimawh zawk tih hria ram hruaitu kan neih chuan a beitham lutuk lo ang. Tin, hnathawktute hlawh atana kum tin mipui sum (mipui chhiah pek khawm) eng zat nge ni ang? Hetiang zawnga chhut neuh neuh chuan ziaawm ve deuh tur chu kan nia ni.

FBO leh CBO te'n sawrkar thawh ai an thawk taima a: Khawvel pumah ruihlo chi hrang hrang ngai/ngawvelte chhan chhuah harsatzia chu, zirchianna tam tak awmah ruihlo ngai enkawl dam / hlawhtlinna rate chu 10% hnuaialam a ni tlangpui a, 07% te a ni. Thih puitham damlohna khirh tak a ni. Chutiang khawpa thil harsaah chuan sawrkar a inthlahdah em em a, kut a kuangkuaah a, dan awmsa pawh a hmang tangkai duh lo a, rinna behchhan pawl (faith base organization/FBO) leh khawtlanga mipui pawl khat (community base organization/CBO) te'n tlawmngaih chhuaha an enkawl zarah sawrkar a kel-e-awl der a. Zahthlak haih haih tak a ni. FBO leh CBO lah an tlawmngai em em a, an tlawmngaih chhan hi an tlawmngai hrim hrim nge sawrkar chak loh vanga kan chhe lutuk tur an ngaingam lo ni ang? A enga pawh chu ni se, sawrkar chuan mipui chhiah pek hmangin chutiang addiction lama thwktu tur a ruai teuh lawi a, ban vek se, chutiang mite hlawh chu khawthlera zu leh

ruihhlo rui man khawmtu, YMA leh zu leh ruihhlo ngawvelte enkawltu, FBO te pe thin tal se, kan ti dawn em ni ang? Kan kalphung hi a ngaihna hriatthiam a har a ni.

America ram aiin kan vannei asin maw le: America ramah ruihhlo ngaite enkawltu FBO an awm ve lo a, khawlaia mi seng hawitu YMA an nei bawk si lo a, an khawpui hrang hrang lamlian hrulah an rui bu suau suau mai a. Mizoram chu FBO te'n ruihhlo ngai an enkawl thin vangin, ruihhlo ngai an tam ang aiin khaw chhung lamlian sira a huhua rui bu suau suau hmuh tur an tam lo a, de-addiction centre-ah kan vawmbo duak thin a. Khawlai leh biak inah kan fel fai hmel tlat a lawm.

A nia sin, sawrkar hi bawng ni loa (bawng chuan tawlailir a hnuk thin a, tawlailir hi bawng hmaa a kal chuan buai hun a awm lo thei lo) bawngtawlailir a nih rau rau chuan tawlailir hnuktu, FBO leh CBO te pui sela, mipui sel luai luai ngai loin fel taka de-addiction centre a kal theih a beiseiawm asin, hetia a sawrkar ber a keleawl der thin vang hian, mipui kan chia i zo ta thin a, youtuber hoin min hnuk kual vel mai mai a nih hi. Phung velh ang maiin an pung tawlh tawlh lehngal!

Engati nge heng dan hi hman a nih loh:? The Narcotic Drugs & Psychotropic Substances Act 1985- Section 71(1) chuan ruihhlo ngaite treatment, management, education, after care leh social integration a tana tling leh tlin home/centre chu mamawh dan azirin sawrkarin a tam thei ang a dinin emaw, mimal leh pawlin an din te a lo recognize ang tih a chuang a. A Chiang hle a ni.

He dan leh section behchhan hian, The Mizoram Management for De-addiction -cum- Rehabilitation Centre (Alcoholic & Drugs Addict) Rules, 1993 kan nei a. Kan lo neih thlip thlep kha sawrkar leh a hnathawk te'n engmah an tihthat peih loh avangin an lo utawk tur vawn mai mai a, drug addict te pawh chu centre/home lama pawnc hhe an uipui tui lian thlir liam mai mai ni awm tak a ni. State sawrkar ve reng ruangin Act, hnuiaia Rules engatanmah a hmang tangkai lo rei lutuk hi a lungchhiatthlak hle a ni.

Dan (act) thupek zam (rule) kaihhraina (guideline) te hi kan nei tha a sin aw! A hmangtu tur sawrkar hnathawk ho hian an rula raw neih mai mai a. Rul hian rua an nei a, an hmang tangkai lo reng reng a, chutiang vel chu a ni. Police hote hian an hnenah FIR lutte hi misual hrem an nih ngei theih nana chhui chhuah tum ai chuan inbiakrem tir zel hi an duh tawh an tia, tak tak ni maw? "Jail a tawt lutuk a, inngaidam mai rawh u" te hi an la tih a nia ka rin. Motor accident te hi traffic leh executive police te'n an insawirem tir nasa lutuk a, insurance company an hlawh ngawt ta ve ang. Sual hi kan pawmzam thei khawp a. Sual kan pawmzam theih chhan chu Pathian tih lo hnam kan nih vang a ni.

Eng pawh ni se, he rules hian de-addiction, counseling, rehabilitation, after care home in an kalpui dan tur te, an daily routine tur te, vantlang nen an thawhdun dan tur te, enkawltu tur te, doctor leh psychiatrist thlenga nei tur an nih te a sawi vek a. Hetiang taka kaihruaitu tur sawrkar ber a keleawl der avangin tun dinhmuna home/de-addiction centre run mek hote en hian he rules hi an zawm lo a ni. A chhan ber pakhat nia lang chu home run a maintain tur

hian financial implication a lian a, tuna kan centre/home neih te erawh mimal, FBO leh gospel team thahnem ngai te'n an din a ni tlangpui a, felfai taka funding emaw an dawng lo a, sawkar atangin support an hmu tha lo bawk a, an kal ve naw naw ni berin alang a. Tute emaw thil pekah an in nghtat tawp mai a.

Ministry of social justice hnuaia, National Action Plan for Drugs Demand Rehabilitation (NAPDDR), centrally sponsored scheme te hi helaia kan home te hian an avail ve phak lo a ang khawp mai a. Sawrkar lamin tan han la thar sela, tuna harsatna kan tawh a zarah Mizoram Drug Treatment cum Rehabilitation Centre Accreditation (Amendment) Rules 2020 pawh an sawi ri ve tawh a. Tun 2020 khan lo peih fel hman sela chuan, he rules hmang hian de-addiction centre khuakhirhin nurse, counselor leh visting doctor te lo pe tal sela chuan centre-a thihna thleng thin a thleng lo ang a, TBCC dintupa pawhin mi sawisel vang mai maiin Pathian thu nena a enkawlte a sezawl chhuah lo mai thei a ni.

Tichuan, sawrkar aimaha nghialnghet, kohhran tinin an member te tal buaipui thei turin han sang phekk bawk sela, ruihhlo ngawlvei piah lama a enkawl na centre/home harsatna hi a ziaawm ngei ngei ang. Kohhran thenkhat a hausa ther thur lutuk hrim hrim hi a tha lo, Pathian theihngihl a hlauhawm. Biak in ropui leh bank-a tangka an dahte vanramah an chhawm thei dawn chuang si lo. Lal Isua lo kal hunah a chuang hnem lutuk dawn a, a uihawm.

Hmawr bawkna: TBCC sawisawltu sawisel ve lehchhawngtute'n an ngaihtuah phak loh chu, TBCC enkawl laia thihna tawkk chhungte rilru na lutuk puak darh thin a ni tih hi. Thihna hi chu a tawp chiang em bawk a. Inrelbawl na mumal lo vanga lungawilohna, ei leh in chhia, saruaka inbual, tui tlan bawlhhlawh, chhungte thil thawn hmu kim lo, thil an zuar to lutuk etc., tih vel hi chu a la pawmzam theih a. Zu leh drug ngawlvei an chhungte'n an enkawl theih loh, Pathian thu behchhana din centre-a enkawl ve lem an thi ta mai thin hi an ngaithiam thei lo ni berin ka hria: Kum 2017 a buaina a chhuaha centre-a enkawl mekte an chhuah chum chum tum khan, Pu Zohmingthanga hmaihma ngeiah, 'Pu Zohming, tuna helna chhuak hi i centre-a mi an thih vang a ni a. Tuntum lo pawh i enkawl lai an thih vanga lungawilo kan hnenah an rawn complaint fo mai. Thihna avangin TNT pawh veng pakhatin an hual tawh. Herald for Christ Children Home, Lungleng pawh home-a an veng naupang thih vangin suasam tumin Aizawl veng lian tak mipuiin an pan hem hem tawh. Mihring hi kan hlu lutuk! Ruihhlo ngawlvei pawh ni mahsela, an chhungte tan chuan an hmangaih leh an mi lungduh, tuma dawmhlum loh leh damdawia enkawl na dawng loa arte thiha thih rikngawt hi a na lutuk a ni. Ruihhlo ngaite hi hriselna derdep tak an ni a, heta i enkawlte hi an dam loh chuan damdawi inah dah lut vat zel rawh. Centre ah ni loin, damdawi inah ngei thi tawh sela, miin an huatna che pawh a ziaawm ngei ngei ang.' tiin khawvelin custodial death a huatzia leh police lock-up leh jail-a mi an thih ngai meuh loh thu pawh ka hrilh zui chiam a. "Ni e" a ti duam duam nghe nghe a ni.

A tawp nan tak tak: Zuathanga Memorial Tawngtai Bethel Camping Centre (ZMTBCC) a nih laia thihna tawkk vengte'n an au khum vanga a enkawl mekte a chhuah tir

hum hum leh TBCC a nih hnu, tuna sawiselna vanga a duh duh chhuah a phal leh si hi a inbuk tawk lo a, a ngheh loh thlak hlein ka hria. Tin, tuna chhuak huk zinga drug overdose a thi pawiti viaute hian, TBCC a thite kha pawl an ti viau ang em?